

տեմբերի) առեալ ընդ իւր զՄուրատ աղա, զԳարրիէլ վարդապետ, զՍարկաւազն իւր և զՎարդան:

### Գ Լ Ո Ի Խ Խ Ե .

Պարտատեարք : Լատինք : Բռնութիւն Քաղաքապետին : Նամականիք Գիմնէսիոսի և պահանջ նորին : Յակոբ վարդապետ : Հարկապահանջութիւն Առասկալին : Տառապանք Խորհրդականաց , փախուստ նոցա ՚ի Քերբոն , և դարձ նոցին անդրէն յԱթոն :

**Յ**ԵՏ մեկնելոյ Գարրիէլ Պատրիարքի յերուսաղէմ՝ պարտատեարք անկեալ ՚ի կասկածանս սկսան վիշտս հասուցանել միարանաց , որպէս թէ հանեալ անուն սնանկութեան , այլ ոչ եւս ունին հատուցանել զտոկոսիս դըրամոց , որոյ վասն խնդրէին և զմայր գումարն և առանց գրաւի ոչ ոք հաւատայր տալ նոցա դրամ . աստի կըրկնապատկեցան տառապանք Խորհրդականաց , մանաւանդ յորժամ փոխանակագիրք յետս դառնային ՚ի կոստանդինուպօլսոյ :

Լատին կղերք ոչ երբէք դադարեալ էին յաշխատութենէ յօրէ յայնմանէ փակելոյ դրան Բեթղէհէմի , և ՚ի սոյն աւուրս չորս նուիրակունք նոցին դարձան յերուսաղէմ մեծաւ հարստութեամբ բերեալ դանձս ոսկւոյ և արծաթոյ , և զհետ մտեալ էին վրդովել զԴատաւորն և զայլ ազգիս քաղաքին՝ առնուլ իւրամ և հանրագիր խոստմամբ դրամոց . զայս առիթ առեալ նոցա սկսան ծանրանալ ՚ի վերայ Հայոց լցուցանել կամելով գանկոպար ագահութիւնս իւրեանց , այլ նոքա երբեմն զհրովարտակն վասն տրոց յառաջ բերէին , և երբեմն զբանս պալատականաց՝ չտալ ումեք զիրս ինչ :

Բազում անգամ գրեցին Խորհրդականք առ Իշխանաւորս ազգին զանխնայ կեղեքումն Քաղաքապետացն Երուսաղէմի , որք մի քան զմի գերազանց գտան ՚ի բռնութիւնս , և բազմադիմի հնարիւք ջանային կողոպտել զՀայս : Այլ քան զամենեսին առաւել եղեւ Իմայիլ Պէյն՝ եղբայր Կուսակալին Դամասկոսի , կուսակից ունելով ինքեան զՆախիպ